



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

PM Modi-i Bihar nung election
nüboyim sentong ka ayongzüka agi

Iran yimden melentsü
Israel nükjiding masü: Netanyahu

VOL. XXII ISSUE NO. 247 (ADOK 247)

DIMAPUR

KÜPTOKNÜ (SATURDAY)

AAMI (JUNE) 21, 2025

₹ 5.00

Tetsür dak mapa tamajung inyaker merenshitsüla: DALT

Dimapur, Aami/June 20 (TYO): Nur Islam-i tanidak auto-rickshaw ka nung June 15, 2025 nü Adiraj Prasad alias Mughavi Zhimomi ta sür nisung kati Chakhesang tsür ka dak tim masüba mapa inyakba kukhua aitsür, ta Dimapur Ao Lanur Telungjem (DALT) sangdong ka ajanga ashi.

Onok temulung akanga khurema jashiba lemsateper aser iba ama tejashi mapang nung la den aser Chakhesang kin den onok nokdaka lir. Iba lendong nungi takum jenbua alila tekeraba nung temang aser tekolok shisatsü nung timtem agütsüba nungi tanepsü angutsü sarasademtsür.

Iba tatalokba ya kisüing masü, saka asen lima nung tetsür anema mapa tamajung inyakba tali akumba tebilemstü sayuba ka lir.

Media kisüing nung aitsüba ya teperi masü. DALT ajanga civil society organisation, tribal bodies aser sorkar indang agency balala dang iba tebilemstü azüoktsü asoshi tzüzüing-özüng, inyakyim takang yanglua mapa kuma amshia aser inyaktstü ayongzüker.

Tetsürtem akumtsüboa aser kumzüka ayutsü ya tongtipang teinyaktstü lir.

Ajidang masü, mapa tamajung inyak ta tai tonglokja alisang Adiraj Prasad ya Naga nunger tejangja masü saka ashikülaka tetsü indang maitsü

amshiba lir, aser iba inyakyim ya Naga nunger customary law agi khenyongi memelar, ta DALT ajanga ashi.

Iba ama tim yimya masüba aser özüng agi memelai maitsü melenshia amshiba tangsa anentsüla, kechiaser iba ya ajanga tribal identity menentsür aser Inner Line Permit (ILP) system nunga tetsükdaktsü agütsür, ta ashi.

DALT-i tribal hohos aser traditional councils ajunga dang tim masüba nung maitsü amshiba tebilemstü bentettsü ajungshir, kechiaser yamai mashishi yutsüra ILP mapa kuma inyakba nung kisüing masü saka asen lisopur temeden wazüka ayuba nunga timtem ajurutsü, ta ashi.

Tatemsä onoki mapang talangka nungi political agreement ajanga statehood anogo, December 1, 1963 ya ILP atema melenshitsü makokba cut-off year asütsü akhangba nenshia ashir. Iba tamendak dak melenshitsü merangra, nüburtemi anema nokdaktsü.

DALT-i tetsür kumzüka ayutsü aser ochi obendang agütsütsü aser Naga nunger lisopur temeden aser ayak wazüka ayutsü asoshi bendanga agütsür nokdaktsü. Iba aibelen mapa tamajung inyaker nem özüng agi melaba ama tapet temerenshi agütsütsü akhanger, ta DALT sangdong ajanga ashi.

School Curriculum Framework atema State Steering committee senden amen

Kohima, Aami/June 20 (TYO): June 20 nü SIEMAT Hall, SCERT, Kohima nung Foundational Stage & School Education atema School Curriculum Frameworks renemtsü asoshi State Steering Committee senden menogo, ta ketdangsertem osang ka ajanga metetdaktsü.

Iba committee nung züngsemtemji Department of School Education, Nagaland Board of School Education, Teacher Education Institutions, Universities aser SCERT nungi shisashirtem aser ketdangsertem aika densema lir.

Tanü amenba senden ya draft document reprangshitsü aser State Curriculum Framework for Foundational Stage tatem kuma renemtsü atema liasü.

Senden nung SCERT Nagaland Director, Kevirale-ü Kerhuo-i tang tashi nung inyaktetba osang metetdakja

liasü.

Lai, state nung State Curriculum Frameworks renemba maparen nung yariteptsü atema nodal agency ji SCERT lir, ajioda iba maparen atema working committee tentet aser committee nung züngsemtemji Department of School Education, SCERT & DIETs, NBSE, Nagaland University, Department of Higher Education, Social Welfare, Youth Resources & Sports aser melungtet telok balala nungi mongintem aser ketdangsertem densema lir, ta metetdaktsü.

Draft document asadangtsü aser renemtsü atema workshops aika ayongzüka agiogo aser iba document renemba nung Azim Premji University Bangalore-ia tongti shilem ka agiogo.

Director-isa school education system lenitsü aser temelenshi adoktsü atema iba document renemtettsüsa

Working Committee nung züngsemtemi anibelem jenti arema kanga nendaka inyakba atema pelaba lemsatep.

Kasa senden nung SCERT nung Senior Lecturer, Vekutulu Veyie-i Nagaland ECCE curriculum metetdakja liasü.

Tang tasen yangluba ECCE curriculum ya pre-primary grades purtem atema renemba contextualized framework lir aser iba nungji Teacher Resource Handbooks densema document shilem pezü lir.

Iba sülen State Curriculum Framework for Foundational Stage (SCF-FS) draft ji committee züngsemtem nem metetdakja liasü. State Curriculum Framework for Foundational Stage ya arrshi küm 3 nungi 8 tsüngdapur tanurtem shisaliok nung rangloker renemba lir.

Iba senden ya SCERT Nagaland Addl. Director, T. Lima Longkumer leniba nung agia liasü.

Ozüng shidak amshira Nagaland nung pharmacy mali akumtsü: ANPA



All Nagaland Pharmacy Association (ANPA) ketdangsür temi Kohima nung June 20, 2025 nü osangbener den jembidang tangokba noksa ka yangi angur.

Kohima, Aami/June 20 (TYO): Health Department ajanga pharmacy ajak nung registered pharmacist shimtsü totuyuba agütsüja aliba atema All Nagaland Pharmacy Association (ANPA) ajanga tebilemstü lemsatepogo aser iba yagi state nung mozü ayokba tesem noklang aika shibangtsüsa akumtsü aser healthcare nung timtem ajurutsü ta ashi.

Hokulbarnü Kohima nung osangbener den jembidang ANPA tir Zhapuvilie Yashü aser tongti zülur Limayanger Jamir nati anir ketdangsür temi Department-i Drugs and Cosmetics Act, 1940, Drugs and Cosmetics Rules 1945 aser Pharmacy Act 1948 mapa kuma inyakba nung pharmacy temi timtem balala ajangshiba indang lemsatepa liasü.

Ozüng akumtsübor aser iba sülen anidaktsü mulunga lir, saka asangsang nung qualified pharmacists peria maliba yong Nagaland nung iba özüng shidak amshitsü tamakoktsü, ta Yashü-i ashi.

Nagaland nung licensed pharmacies 1,157 lapoka lir, saka registered pharmacists bo 278 dang lir, aser item nungi 252 sorkar indang health units nung mapa inuaker aser nisung 26 dang private pharmacy asoshi anünger, ta Limayanger Jamir-i ashi.

Districts aser subdivisions aika nung registered pharmacists mali, aser state yimtiba Kohima nunga iba özüng ya shidak amshira pharmacy services ajak samatsü jenjang nung lir, ta pai ashi.

Meluri district nung pharmacy trok lir, Shamator nung pharmacy pezü lir aser yangji pharmacist maka, aser Phek district nung pharmacy 34 lir saka in-service pharmacists ana dang lir, ta ANPA ketdangsür temi ashi.

"Ratio khenyongi meputeper, aser asangsang nung temelen mera makai özüng benoka amshiba ajanga public health system nung timtem tulu ajurutsü," ta Jamir-i ashi.

Drugs Control Administration, Health & Family Welfare Department kübok mapang talangka licensing mapareninyaka aru aser pharmacy tem mapang shia licensing aser renewal fees agüja aru.

Ajisüaika 2021 küm tatemlen nungi department-i pharmacist shimtsü özüng agütsü tenzük, aser sorkari tuyuba sülen private pharmacy ketdangsür temi pharmacy ishika nung regular pharmacists shim saka nübu agi kanga anünga yong ajak nungbo pharmacists tem meshimtet, ta Yashü-i ashi.

Pharmacies union ya district ajak nung tentet aser state level nung ken o bener oa jembitsü mechi ANPA kübok March 13 nü lungjem ta pai ashi.

Mapang atsülangtsü mesüra phase lemsar inyaktstü atema Principal

Director, Commissioner & Secretary of H&FW, aser Health Minister dangi aiben tezüluba nung agüjaka telangzüba mali, ta ANPA ajanga sasaba lemsatep.

Chief Minister dangi züluba tang tashi telangzüba mongui lir ta parnoki ashi.

Temelen inyaktstü asoshi

sentong makai policy mapa kuma inyakra tesem aika, talisa yimdak yimtsüing aser meta talang nung aliba district tem nung tongtipang mozü tem mongui akumtsü, ta ANPA ajanga tekumdagtsü ashi.

"Ozüng shidak amshira, Kohima nunga aser district kar nungbo pharmacy kata mali akumtsü," ta parnoki ashi.

Nagaland nung pharmacy nungi mozü meshidak agütsüba ajanga nisung takum lendongi yokba ken o kata mali, ta parnoki ashi aser COVID-19 mapang official channels temi mozü magütsüteti timtemdang pharmacy temi tongti shilem agiba indang bilemteta ashi.

India nung pharmacy institute kata maliba state ji Nagaland ya kisüing lir, aser state kata nunga kasa nübu agi anünga yong iba policy takok ngua mapa kuma inyakba mali, ta ANPA ketdangsür temi ashi.

Sorkari lapoka aliba health centres tem nunga mozü agütsütsü asoshi ita asem training agir aliba nurses dak metaloker alir nung sorkari kodaser private pharmacy temi iba özüng sülen anidaktsü imlar, ta parnoki asüngdang.

"Sorkari mozü agütsütsü asoshi nurses nem training agüja temelaba agütsüra, kechiba infrastructure shidak mali tashi iba mesükba solutions pharmacy tem nem magütsür?" ta ANPA ajanga ashi.

Taoba küm state indang Drugs Control Administration ajanga parnok pharmacy license tem 2028 tashi atema renew sür liaka parnoki May ita nungi show cause notice aser license cancellation orders agütsü tenzükogo, ta ashi.

Onoki policy anema nokdaker masü, saka sorkar dang Nagaland nung iba policy shidak amshia aotsü tensa nung masü dang angatettsü ajungshir, aser khen atema salatsü aser asangsang nung mapa kuma inyaktstüsa sentong yanglutsü ayongzüker, ta ANPA ajanga ashi.

Nagaland nung pharmacy institute mesür nübu peria mali tashi, department dang pharmacy tem maneni lapokdaktsütsü mepishir, ta ashi.

Mokokchung police-i lenmang nung lendong mataloktsü asoshi inyaker



Senior Superintendent of Police, Mokokchung Shri.Vesupra Kezo-i (abelen nungi trokbuba) Mokokchung Traffic Police nem osettsüset balala agütsür kelen Traffic Police aser Police tulurtem külemi tangokba noksa.

Mokokchung, Aami/June 20 (TYO): Mokokchung Superintendent of Police office nung tanü Shri.Vesupra Kezo, Senior Superintendent of Police, Mokokchung-i Mokokchung town nung gari senzüsempoongertem tiptema senzütsü aser gari lendong nungi kümzüka alitsü asoshi osettsüset tapu balala convex mirrors, solar-powered delineators, solar powered blinkers, ttreath analysers, reflective tapes, and securify perimeter tapes nunger Mokokchung Traffic Unit nem

agütsüogo ta Mokokchung Police osang ka nung Addl. Superintendent of Police & PRO, Mokokchung, Nagaland ajanga metetdaksü.

Mokokchung town nung lenmangtem nung osettsüset tapu balala inokja teteyuba agütsütsü aser itemji ajanga gari lendong nungi kümzüksü asoshi Traffic persons-temi nentaka inyaksülata ajungshia ashi paisa Mokokchung town nung lenmang kanga dang tila süaka gari aika dang küma dokogo saka Mokokchung Traffic Police-i timtem jenti

arema kanga nentaka inyakba ajanga Mokokchung nung garitem lendong mataloki tiptem senzüsempoongdaksüba asoshi Traffic Police-tem dang SP Mokokchung Vesupra Kezo tepelaba metetdakja ashi.

Mokokchung Traffic Police-i Mokokchung town nung lenmang nung lendongtsüdong matalokdaksütsü asoshi inyakba nung Mokokchung nüburtemia Traffic Police den yaritepdaktsünerta temepishiba olen ka kasa sangdong nungsa metetdaksü.

PLVs atema Kohima nung orientation sentong ayongzük

Kohima, Aami/June 20 (TYO): Hokulbarnü Nagaland State Legal Services Authority (NSLSA) ajanga Para Legal Volunteers (PLVs) asoshi state level orientation sentong ka Japfü Hotel, Kohima nung ayongzüka liasü.

Registrar, Gauhati High Court, Kohima Bench, Ajongba Imchen, NJS ajanga sentong nung tayongzüka o jembidang Para Legal Volunteers temi makamaiter aser tajemzüka jenjang nung alirtem nem angati legal aid agütsütsü Constitution indang Article 39 (A) nung mela lir aser parnok ya pei alidak tesem nung tajemzüka tia nung alir asoshi nokdaker tashi taittiba nisungtem lir, ta ashi.

District ajunga nung PLV shimtsü asoshi Legal Services Authority Act, 1987 indang Section 4 & Section 6 ajanga member secretary nem tashi agüja lir, ta PLV shimba indang pai rateta ashi.

Article 39 (A) nung shia aliba ama, state sorkari ozüing mesüra scheme tapet yanglua makamaiter nem angati ochi obendang agütsütsü asoshi state sorkar dang shia lir, ta Registrar, Gauhati High Court, Kohima Bench ajanga ashi.

PLVs ya Volunteers ama mezüngshitsüla aser parnok mapa ya 'legal' küboki aiter, ta pai jangjatsü.

Nenok volunteer ka asüyonga nenok teinyaktsü ya nüburtem legal rights agiba nung yaritsü aser iba dak alema oa lir, ta pai ashi.

Tajemzüka jenjang nung alir nem legal aid agüja par temeden wazüka ayutsü ya PLV indang fundamental duty lir aser PLVs nungi legal angutsü ya makamaiter indang fundamental rights lir, ta Imchen-i ashi.

NSLSA Member Secretary, Neiko Akami, NJS ajanga pela agizükba o jembidang, Para Legal

Volunteers shimba nükjidong ya makamaiter yaritsü asoshi lir, ta ashi.

Member Secretary ajanga PLVs tem dang pei mapa nung temulung agüja inyaktsü aser front office den teti osang agitepa alitsü ayongzüka liasü.

Orientation session mapang Deputy Legal Aid Defense Counsel, Kohima, Kezhosano Kikhi-i 'Concept of Para-Legal Volunteers and their Role, Duties and Responsibilities' onük nung jembia liasü.

Maneni Retainer Lawyer, Kohima District Legal Services Authority, Sunjib Rana-i Ethics and professional conduct of PLVs & Maintenance of PLV activity register, report and record keeping onük nung jembia liasü.

Sentong nung Cherry Ovung, Panel Lawyer, NSLSA menden liasü aser iba sentong nung District Legal Services Authority nungi PLVs 50 dak tema dena liasü.

Dimapur nung nisung tasü mang ka nguteta lir

Dimapur, Aami/June 20 (TYO): Mejangjaba nisung tasü mang ka Thilixu village nung Dunlop factory anasa lir ta June 20, 2025 nü Diphupar Police Station nungi telephone ajanga osang ka arua liasü.

Osang angashir duty nung alirtem iba tasü mang aliba tesem bushia ao aser mejangjaba tetsür tasü mang ka

rubber farm, Thilixu village nung aliba ngutet.

Ozüing agi melaba maparen ajak tembangba sülen tasü mang ya PM examination aser jangjatsü atema District Hospital Morgue nung bener oa lir.

Iba nisungba ya pyjama sentü tenenya, T-shirt sentü tanak, temeyong nung nail polish

sentsü temerem, tetsüing abelen angü tanak, achichilen angü temerem aser sentü tanak rubber watch agir liasü.

Kibur/kinunger/tembar temi Officer-in-charge, Women Police Station, Dimapur den Mobile No.7085055027 ajanga tongteprateptsü akok, ta Dimapur Police sangdong ka ajanga ashi.

Juvenile tem maitsü kümzüka ayutsü metetdaksü

Dimapur, Aami/June 20 (TYO): Tawa tatalokba ka nung minor ka indang maitsü yimjak nung metetdaksüba dak sendakba nung Commissioner of Police, Dimapur, Nagaland-i kija aser lokti tentet (media, civil society, aser institutions) ajak dang conflict with law (CCL) dak sendakba nung tanurtem maitsü kümzüka toktsütsü atema temzüing ozüing dak ajemdaker pei tinyaktsü mapa shitak benoka inyaktsü metetdaksüogo.

Juvenile Justice (Care and Protection of Children) Act, 2015 kübok Section 74 nung tanur ka ozüing alema inyaksangshiba mesüra temzüing ozüing ken o ka nung densema lira parnok indang

tenüing, noksa, school, kibong, address mesüra tanga osang kecha memetetdaksütsü tenokdangba agütsür lir. Iba tetuyuba sülen manidakertem ita trok tashi tepuokdak ayutsü mesüra senchi sen lakh ana tashi achitsü mesüra temerenshi anaprongla agi merenshitsü.

Iba amala aibelen atema temzüing ozüing dak ajemdaker merenshiba dang masü saka iba ajanga tanur aser parnok kibong noksa raksatsür aser tekelok shisatsüa minprongdaksür. Onoki media houses, content creators aser nüburtem dang iba amala osang ya melemsateptsü, tanaben post masütsü mesüra publish masütsü mepeshir, ta kasa sangdong ajangasa metetdaksü.

Chumoukedima DC-i NH-29 nung inyakyim kar tenokdangba agütsü

Dimapur, Aami/June 20 (TYO): Chumoukedima Deputy Commissioner, Polan John, NCS-i sangdong ka ajanga, National Highway 29 anasa long atepba, ali atuba, kiojen asüba, süngjanglijang aser aonsotsü ayoktsü atema stall amenokba aser ali dak sendakba nung inyakyim balala benoka inyakba District Administration-i angazükogo, ta metetdaksü.

Item inyakyimtem ajanga Highway raksatsütsü aser nüburtem lendong nung toktsütsü.

Iba dak sendakba nung infrastructure kümzüka ayutsü aser lenmang nung senzürtem aser nüburtem kümzüka

toktsütsü atema kija, village council tem aser stakeholder tem dang long atepba, ali atuba, yokyatsüyatsü atema stall amenokba mesüra iba amala mesükba inyakyimtem NH-29 anasa benoka minyaktsü tetuyuba agütsüogo.

Ken o dak sendaka alir ajak dang teka amteper inyaktsü mepeshia metetdaksüogo. Osang tejangjaba agitsü atema DC office den tongteprateptsü metetdaksüogo.

NH-29 raksatsüsa aser kümzüka metoktsütsüsa inyakyim kar danga benoka inyakba ngutetra temzüing ozüing dak ajemdaker jenjang tapet agitsü, ta kasa sangdong ajanga metetdaksü.

GHS Forest Colony nung metsümeshiba tesem ka lapok



Dimapur, Aami/June 20 (TYO): Government High School (GHS) Forest Colony, Kohima nung tawa yangluba toilet aser urinal tem semzüka sentong ka agiogo. Iba metsümeshidak ya Joint Secretary, Department of School Education, Avelu Ruho-i semzüka liasü.

Sentong nung o jembiba mapang Ruho-i, infrastructure nung toilet pongu aser urinal ter densema lir, aser iba ya Samagra Shiksha-i sen lakh 5 agüja tenzü, aser teaching faculty-i senotsü bushiba den temeimertemi tenla agütsüba agi yanglua liasü, ta ashi. Iba metsümeshidak ya sen lakh 9.6 intoka yanglua liasü. Laisa, metsümeshidak tiles lemtsüogo aser electricity aser tzu facilities teperi inokja lir, ta shisem.

Ruho-isa, school 2009 küm tenzüka bilemtetshia jembia aser school renloka aoba ya

Forest Colony nung alirtem, tsürapurtem aser tesayurtemi bendanga agüja inyakba ajanga lir ta ashi.

Sentong nung Forest Colony Council Chairman, Peter K Rengma aser Graduate Teacher, GHS Forest Colony Albert Tungoe nati o tatsütsü jembia. Faith Harvest Church Pastor Avi Zao-i Tsüngrem temaotsü meshizüka sarasadem aser Class 7 kaketshirtemi ken tajung ka tena liasü. Sentong nungsa Graduate Teacher Honoli Y. Sumi-i tepela o jembia liasü.

Sentong ya GHS Forest Colony Assistant Headmistress Swedesenuo Zao lenisüba nung agia liasü. Sentong nung Ward-17 nungi Chairman aser züngsemtem, Forest Colony, Electrical, Mewibogei, Upper Agri colony Chairmen tem aser Agri Farm, Goan Buras, SMC, SMDC züngsemtem aser tesayurtemi shilem agia liasü.

Iran aser Israel na nung India nunger aika tetsübu tensa nung lir



Tang Iran aser Israel na tsüngda raraba dak sendakba nung June 20, 2025 nü Lucknow nung Shia Muslim lenir, Maulana Kalbe Jawad leniba nung Muslim nungertemi US Tir, Donald Trump aser Israel Ato kilonser Benjamin Netanyahu na anema longkak aitba noksa nung angur.

New Delhi, Aami/June 20

(Agencies): Tang Israel aser Iran na tsüngda rara tamajungba akümba tensa ka nung linük ana nungji India nunger aika tetsübu tensa nung lir; linük ana nung aliba India nungertemi kaketshirtem, temeshi ainlen jajartem, research agirtem, medical institution nung inyakertem aser mapa balala inyakertem lir.

Tehran aser Tel Aviv na nung aliba Indian Embassy nung ketdangsertemi India nungertem linük ana nungjagi aienshidaktsüba maparen nung yaritepdar, ajisiüaka India nunger aika tesem balala nung prokshia aliba ajanga tetsükdaktsü ajurur.

Tan hopta tetenzüklen Israel-i missiles amshia Iran amakba mapang nungi Uttar Pradesh kübok Sakhni yimdak nungi Iran-i oa azünger kaketshir 10 denbo tongtepratep mesüteter. Parnok rongnung Tehran University nung MBBS 3rd year student arrshi küm 22, Sadaf Zehra densema lir.

Zehra tebu, Zia-ul-Hassan-i, "Lai la junga dang lir ta ashi, ajisiüaka iba sülen la phone switched off süadok. Tasüngnü lai call süa university-i kaketshirtem ajak tesem kati anir ogo, ta metetdaktsü," ta ashi.

Ano India nunger kaketshir Azhar Abbas-a missile lendong nungi tera agi dang jenbua liasü. Par class purbo pongu süadok.

Uttar Pradesh kübok Lucknow, Prayagraj, Varanasi

asir Meerut nungia nisung aika Iran-i temeshi aini oa liasü, aser tang tashi meyipa maruteter. Parnok rongnung Lucknow nungi temeshi aini aoer nisung 28 densema lir.

Temeshi aini aoer arrshi küm 83 Kaneez Haider-i, "Tang tashi nungbo onok kümzüka dang lir, ajisiüaka meyipa aruner. Hotel nung amongba nung sen aika adoker, anungji anogo aika amongtsüsa onok ket nung sen peria mali," ta metetdaktsü.

Parnok May 27 nü Iraq-i apuso aser parnoki Iran nung Karbala, Mashhad, Tehran, Nishapur aser Kashan semdangtsü sentong liasü.

Osang angazükba agi, Lucknow yimti kija nungi temeshi aini aoer nisung 1000 dak tali Iran-i oa lir, ajisiüaka parnok senotsü temogo aser tanaben meyipa aruner.

Meerut nungia temeshi aini aoer nisung 11 shi anogo pongu tejaklen meyipa arutsü sentong liasü saka tang tensa ajanga meyipa maruteter.

Haridwar nungia temeshi aini aoer nisung 36 Iran nungi maruteter. MLA Qazi Nizamuddin-i shidi ka ajanga Ato kilonser aser state sorkar dang, rara adoka aliba tesem ka nung parnok lir, anungji tekaraba nung parnok anir arudaktsüner, ta mepishiogo.

West Bengal kübok North 24 Parganas district nungia temeshi aini aoer nisung 11 May 30 nü Iran tonga aoba

sülen June 18 nü meyipa arutsü sentong liasü saka meyipa marutetba dang masü June 18 anogo nungi parnok den tongtepratep mesüteter.

Azerbaijan den arrtsülen aliba Iran kübok Astara jila nung Kolkata nungi professor Falguni Dey-i Armenia-i aotsü renemdar. Pa Iran yimtiba, Tehran nungi ajenba sülen Azerbaijan-i aotsü atema mepishi, saka anogo asemnü tashi telangzüba manguba agi pai Armenian e-visa agüjang ta mepishiogo.

Dey-i, "Joko kü ket nung sen mali. Arrtsüji kilometer 450 pilar lir, ajisiüaka ni tekeraba nung iba tesem toktsüner," ta metetdaktsü.

Ano külen Israel nunga India nunger aika tetsübu tensa nung lir. Tel Aviv nung alir Assam nungi Researcher Preetam Regon-i, "Onok aliba tesem nungi kilometer ka shi pilar aliba tesem ka nung missiles apok. Indian Embassy-i onok dang India-i oner asü ta asüngdangogo. Karbo meyipa aotsü renema dang lir," ta metetdaktsü.

Tehran aser Tel Aviv naprongla nung Indian Embassy-i India nunger sensotem yaria Armenia, Jordan aser Egypt linüktemi anir odar. Israel arrtsülen adena anir aoba sülen India sorkari achaayangtsüba tayimtsü ajanga India nungertem anir arur.

Air India tayimtsü nung aliba black box bendangleni yoktsüa akok

Mumbai, Aami/June 20

(Agencies): June 12, 2025 nü Gujarat kübok Ahmedabad yimti nung Air India tsükokba lendong nung nisung 270 dak tali asüba sülen tayimtsü tsükokba kuli bushisüngdangdar.

Air India tayimtsü nung aliba flight data aser cockpit voice recorders nungjagi osangtem jangjatsü atema itemji asadangtsü asoshi bendangleni yoktsü asü meyoktsüar Aircraft Accident Investigation Bureau (AAIB)-i tang tashi nungbo telemtetba magi, ajisiüaka bendangleni yoktsüa akok ta osang angazüker.

Media karibo tayimtsü nung aliba black boxes ji bendangleni yokogo ta osang prok, ajisiüaka ministry of civil aviation-i tang tashi nung telemtetba magi, ta jangjashitsüogo.

Ministry-i, "Technical, safety aser security lenlatem asadangba sülen item ajakji asadangtsü asoshi koba tesemi yoktsüar AAIB-i telemtetba agitsü," ta metetdaktsü.

Air India tayimtsü tsükokba


sülen tayimtsü tsükokba tesem nungjagi Enhanced Airborne Flight Recorders (EAFRs) "black boxes" nguogo.

Flight data record asüba aser cockpit audio indang unit anaji ka June 13 nü aser ka June 16 nü nguteta liasü. Itemji ajanga tayimtsü tsükokba kuli jangjatsü.

Data recorders ji ajanga tayimtsü nung gear aser flap levers position jajaba den külemi thrust settings, engine-i mapa inyakba aser totzü yimba densema fire handle activation jangjatsü.

Tayimtsü nung aliba "black boxes ji ajanga tayimtsü tsükoktsü mapang nung tatalokbatem aser tayimtsü tsükokba kuli jangjatsü.

Ajisiüaka media osang kar ajangabo, tayimtsü nung aliba recorders ji mi agi kanga mejungi raksatsüogo, anungji India nungbo black box nungjagi osangtem agizüktsü kanga tasak asütsü, anungji black boxes ji US-ia yoktsüa akok, ta metetdaktsü.



'International Day of Yoga' jelia June 20, 2025 nü Agra nung Taj Mahal anasa tetsür kari Yoga exercise agidang tangokba noksa nung angur.

PM Modi-i Bihar nung election nüboyim sentong ka ayongzüka agi

New Delhi, June 20

(Agencies): Taküm küm junga lir. Anungji tang Siwan nung terenlok project aika sangdongba ya taruba election nung BJP aser NDA teloktep jengang tajungba akümtsü nükjidong nung inyaker, ta bilemer.

Siwan nung item projects sangdongba mapang Modi-i, "Item mapatong ajanga Bihar nung sensakertem, backwards kintem, Dalit aser Mahadalit nisungtem taküm jengang tajungba akümtsü. India ya alima nung rongsenkettzüng tulutiba linüktem rongnung jengang tasembuba akümtsü aser iba lenmang nungji jajadang Bihar-i tongti shilem agitsü," ta metetdaktsü.

Paisa tesüba küm 10 tsüngda Bihar nung NDA teloktep sorkari terenlok mapa balala inyaktsüba metetdaktsü. Bihar yimtsüngtem nung gari lenmang kilometer 55,000 yanglutsüba, kibong crore 1.5 nung electric light mesangoktsüba, nütsüng crore 1.5 nem tzü mesangoktsüba aser kibong crore 4 nem ki agütsüba pai metetdaktsü.

Tang Shahabad region nung assembly menden 22 nungi BJP MLA ana dang lir. Siwan nunga assembly menden 8 nungi BJP MLA ana dang lir.

Item region nung opposition

INDIA teloktep jengang kanga junga lir. Anungji tang Siwan nung terenlok project aika sangdongba ya taruba election nung BJP aser NDA teloktep jengang tajungba akümtsü nükjidong nung inyaker, ta bilemer.

Siwan nung item projects sangdongba mapang Modi-i, "Item mapatong ajanga Bihar nung sensakertem, backwards kintem, Dalit aser Mahadalit nisungtem taküm jengang tajungba akümtsü. India ya alima nung rongsenkettzüng tulutiba linüktem rongnung jengang tasembuba akümtsü aser iba lenmang nungji jajadang Bihar-i tongti shilem agitsü," ta metetdaktsü.

Paisa tesüba küm 10 tsüngda Bihar nung NDA teloktep sorkari terenlok mapa balala inyaktsüba metetdaktsü.

Bihar yimtsüngtem nung gari lenmang kilometer 55,000 yanglutsüba, kibong crore 1.5 nung electric light mesangoktsüba, nütsüng crore 1.5 nem tzü mesangoktsüba aser kibong crore 4 nem ki agütsüba pai metetdaktsü.



June 20, 2025 nü New Delhi nung BJP MP, Bansuri Swaraj aser party MLA temi osangbenertem den jembiba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 21, 2025

Karibo Nuclear Amshitsü Marendaktsü

- Tangsen Lemtur

Taküm October 22-23 anogotem nung North Carolina kübok Charlotte nung Kontek Industries & Holtec Security International-i Nuclear Security Summit ayongzüka akatsü sentong lia tawa Israel-i Iran nung nuclear facilities amakba aser Iran nung sepai tongti ketdangsertem aika tepsetba ajanga tetsükdaktsü ajurutsü südi ta bilemer. June 20, 2025 nü Iran Foreign Minister Abbas Araghchi-i, "Israel-i amakba ya manen tashibo Iran nung nuclear program atema onoki US den ken o mejembitsü," ta shiogo. International Atomic Energy Agency (IAEA)-i ashiba agi, Iran ya nuclear hadir aliba linük ka mesüaka nuclear yangludang amshiba 'uranium' jenti adokdakja bendenba linükjibo Iran kija lir. Ibaji ajanga Israel-i Iran ya nuclear tashi aliba linük ka mekümdaktsütsü meranger. Tamalen Israel Ato kilonser Benjamin Netanyahu-i, Iran ket nung nuclear hadir lira ibaji Israel nung atema dang masü saka alima rangben atema amokmeren ta metetdaktsüogo. Netanyahu-i, "Asenok tang iba tensa (raraba) nung aliba ya asenok (Yihuda nung) taküm alitsü atema lir, aser ibaji Israel nung senso ajaki angateta dang lir. Iran nung ket nung nuclear hadir lira aser ibaji Israel nung aliba yimitem anema amshira kechi ataloktsüar asenok ajaki meteta dang lir," ta ashi. Nuclear atomic bomb ya alima linüktem atema amokmeren tulu lir ta shisateta bomb tesashi amshia kiralongraba nokdangtsü nükjidong nung 2009 küm taoba mapang US Tir, Barack Obama-i küm pezü tsüngda alima nung nisung tamajungertem ket nungi nuclear osettem kümzüka ayutsü atema alima linüktemi merangtsüla ta tayongzüka agütsüba sülen 2010 küm nungi Nuclear Security Summit (NSS) senden mena alima nung nuclear raraba osettem kümzüka ayutsü atema alima linüktemi yaritepa inyaka arudar. 2010 küm Washington nung mezüngbuba NSS senden alidang alima tesem ajaklen nungi nuclear raraba oset bendentsü nükjidong ayu aser 2012 küm South Korea, Seoul nung 2buba NSS senden nung- alima linüktemi senden tapet ayonga akaba den mapatong balala nung shilem agiba ajanga nuclear osettem kümzüka ayutsü bangjema liasü. 2014 küm Netherlands, Hague nung 3buba NSS senden nung alima linüktemi senteper tongtibang sangdong aika agüja liasü. NSS senden asemprong ajanga takok aika nguogo. Takok tulu rongnung NSS ajanga linük 12 nungi Uranium aser Plutonium den nuclear facility 24 agentetba ya asütsü. Iba dak alia NSS-i alima nung nuclear rizüngba tesemtem azüoktetba den külemi tim mesüi nuclear shishilembaba networks mittsü atema telok tenteta liasü. 2016 küm NSS senden nung nuclear facility aser nuclear osettem kümzüka ayutsü atema linük aikati tezüngzüktep agi. 2010 küm senden nung, ano maneni linük 12-i tezüngzüktep agitsü nüngdak ta bangjemba sülen linük 5-i tezüngzüktep agi. Ano 2014 küm NSS nung tezüngzüktep agir linük 35-i, 'Nuclear security mapatong tashi itdaktsür' ta sangdonga liasü. Iba sangdong nung linük aika dena liaka Russia, China, India aser Pakistan densema linük tongtibang aika maden. Tim masüba nung nuclear amshiba ya alima atema amokmeren tulu ka lir, aser iba ajanga pei linüka kongshitsü akok ta linük aikati rajemogo. Alima tzü-mopung lendong tulu aika lir, aser itemjibo nisungi menokdangteter. Linük o linük na tsüngda, tamangba yimsü tsüngda aser tentet balala tsüngda meputepba ajanga nisungi yangluba lendong aika adoker. Tanü putu nung meimchirtemi sayangtetba nuclear rara nungibo tashi tulu aliba linüktem-a jenbua mali, ta tashi tulu aliba linüktemia rajema dang lir, ajisüaka tamajungertemibo 'ajak takoksa angutsü' ta metetsümonga nuclear amshitsü marendaktsü.

OLEMSABANG

Kübu apuba kolakji sentsüwangshi korang

L. Kika Pongener

(Yashi adok nungi...)

Atangji, Tsüngrem mapa nung Tsüngrem mepelatsüsa tenzükra, Eli Putir kibong atakademba ama atakademtsü kecha meteta maka. Anungji kanga dang asüngteta meshiteta bendanga agütsür tenzüksüla. Tsüngrem tenzükra ya junga tenzükra jangrademtsüka, saka ano mejungi tenzükra tetsübotsüka asütsü. Tsüngremi azüngashia atakatempa ama Israel nunger Filistia nunger den raradang, Israel nunger sepoy meyi semer tepset, ozüng sungden rakzüka bener yok, aser Eli-er jabaso Hofni aser Finehas külemi tepset" (1Samuel-4:10-11). Aser iba osangji angashir Eli Putir pa amenba menden nungi tsüker tekong kosuker asü (1Samuel-4:18). Atangji, Eli Putir ka suaka, Tsüngremi nungloktsüba mapa nung Tsüngrem jashitsüsa inyak nungji, nuburi Tsüngrem nem tenla agütsüba nung ochimashi aibelen nungji, Eli dak jakzükra nisung kodanga 'Kibuba madang jajatsüsa/tenzüksüsa kata malitsü'...Tetezü Tsüngrem'er mapa nung tenzüker kata malitsü...ta Tsüngremi azüngashia atakatem... "Ne kidong aser nebuer kidongi teti kü madang jajatsüla ta ni ashi; saka aji kü dang nungi talangka piladakjang" (1 Sam-2:30). Ajiser, Eli dak jakzüker kata tambur sua arishia malitsü, saka tebenjem mapang nung asütsü (Death) ta azüngashia atakadem. Atangji, Eli Putir ka suaka, pai küpu pua arishia alitsüba sentsüwangshi korangji majangzüktet, aser pa dang masü, saka pa dak jakzüker chirnur aser semchisemnur dena küpu pua arishia kata malitsüsa pai aazük. Atangji, küpu apuba kolakji sentsüwangshi korang aser aji temeshiba takümi dang ajangzüker.

Tsüngremi nungloktsüba mapa nung, Tsüngrem jashitsüsa aibelena tenzükra-yong Eli Putir-i temoatsü melena atakatem-ang aazük. Yimden yimsusur-a suang, arogo aser mungdang nung tenzüker-a suang, lokti nung lennir-a suang aser nutsüng-nubu ka danga suang, shirnoki Tsüngremi nungloktsüba mapa nung shitak meinyaki aibelena inyakdir/tenzükdir, "Küpu pua arishia aliba sentsüwangshi korangji majangzüktettsü". Atangji, aikati kou tanak agi temesung küma arishia linur, saka aseni linuyong alitsü masü, mesura melinuyong malitsü masü, saka asen arishi anogoji Tsüngrem kapu nung yua lir. Tsüngrem o-i ashir, "Kechiyong nisung tamajung arr mashitsü" (A.Shin-24:20). "Kechiaser tamajung inyakertem leptoktsü" (T.Ken-37:9). Anungji kechi komala nisung ka sudir suang, takar-tulur-a suang, sensaker-tilar ka danga suang, shirnoki taküm nung asüngteta, merukteta, ochishia alir, parnok jagi dang küpu pua arishia aliba sentsüwangshi korangji ajangzüksü. Anungji nisungi nguaka-monguaka, züngshiaka-mezüngshiaka, shirnoki pei nem nungloktsüba mapa nung Tsüngrem pelatsüsa ochishia inyaker/tenzüker parnokji dang kou tanak agi temesung küma arishia alitsü, kechiyong iba ya temeshiba taküm ajanga dang ajangzükteter....ta laishiba nungji jangja-janga shia angur.

Shirnoki Tsüngrem tsüngken tsüba pa tsüngsu nung jajar, pa dak jakzükra chirnur/semchisemnur tashi azükaroa alima senmang tajung amanga arishia lidaktsütsü. Tsüngrem o-i ashir, "Nisung shia shibai Kibuba tsüngken tsübur, shibai pa lenmang nung jajar pa temoatsü. Kechiyong ne ket agi züsentetba nai achitsü. Na tepelatsü alitsü aser ne den junga alitsü. Ne kidang kilung nung ne kinungtsüji tejang atangba tsükmenatsüdong ama alitsü. Ne chirtem ne langpang meketa olive sungdong ama alitsü. Ajiang, Kibuba tsüngken tsübuba nisungji yamaji alitsü" (T.Ken-128:1-4). "Kibuba dak amangang aser tajung inyakang, aji sura na alima nung taso shia alitsü" (T.Ken-37:3)...tetezü arishia alitsü. Atangji, Tsüngrem nungi senmang tajung aazükbaji... Oboula dang nungi obala tera tajungba aser tashitemetetba asütsü, ano obala dang nungi par chirnur-ji kanga tajungba aser tashitemetetba asütsü, aser ano par chirnur dang nungipo semchisemnurji kanga agi tajungtiba aser tashitemetetba asütsü...ta senmang amangtepyonga aotsü. Anungji asenok ajaki küpu pua arishia alitsüba aser taküm nung azükaroa alitsüba senmangji ajangzüktettsüsa asüngteta, meshiteta aser ochishia lidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Copenhagen yimti tezülen tang mezüŋ Tenla ki ka semzük



June 15, 2025 nü Denmark nung Copenhagen yimti tezülen Nordhavn (North Harbor) district nung tang mezüŋ Tenla ki ka semzükba sentong nung tangokba noksa nung angur.

June 20, 2025: Denmark nung Copenhagen yimti tezülen Nordhavn (North Harbor) district nung tang mezüŋ Tenla ki ka semzükogo.

Square-metre 76 nung asüba Tenla kiji Hans Egedes Parish indang lir.

Tenla kiji süngtsük agi asü, Tenla ki telung jagi anüŋ tesangwa aiter, veranda nung menden kar lir aser Yisu nütsüŋ 12 aliba atishia jara 12 lir.

Iba district nung nütsüŋ kanga kera renlokba ajanga Tenla ki asütsüsa aküm. Tenla

ki tulu asütsü tebilemba liasü saka city planning department-i nokdangba agi Tenla ki tila ka dang süa atar, ta osang angazüker.

Osangbener den jembidang Tiny Church Nordhavn Project manager, Johanne Dal-Lewkovitch-i, "Iba ya (Tenla ki tulu asütsü memelaba) tejashitsü osang ka ama züŋshitsü melen onoki jungjunga shisadangba sülen Tenla ki tilaka dang asüyonga asütsü telemtetba agia research agi tenzüka liasü," ta metetdaksü.

Dal-Lewkovitch-isa, Tenla ki architect ji Khristan, Julius Nilsson lir. Tenla ki telung tesadem asütsü atema pai Tenla ki jara 12 asütsü apiteta liasü, ta metetdaksü.

Dal-Lewkovitch-isa, Tenla kiji melamela tesem belenshia amshitettsü, kechiyong ya khenpiga atema asüba dang lir, ta metetdaksü.

Denmark nung Khristan nütsüŋ teimba lir. Iba linük nung nütsüŋ shilem 71 bo Lutheran Church of Denmark (Den Danske Folkekirke) nung züŋsemtem lir.

MP nung High Court-i Khristan mungdang agitsü temelaba agütsü

June 20, 2025: Madhya Pradesh nung sorkar ketdangsertemi Khristantem mungdang ka agitsü atema temelaba magütsü, ajisüaka Madhya Pradesh High Court-i Khristan mungdang agitsü atema Khargone district nung aliba Khristantem nem temelaba agütsüogo.

Sub-Divisional Magistrate (SDM)-i Khristan mungdang agitsü atema temelaba magütsüba sülen Atmik Jagrati Mahotsav (Spiritual Awakening Convention) tayonger, Pastor Tana Solanki-i High Court Indore bench nem temepishiba agüja liasü.

Iba mungdang ya tesüiba küm pongu tashi agia aruogo aser taküm-a May 16 nungi May 18 tashi Gram Sirvel, Bhagwanpura Tehsil nung iba mungdang agitsü sentong liasü, ajisüaka SDM-i India-Pakistan tensa nung ajemdaker Khristantem nem temelaba magütsü.

Solanki-i iba mungdang agitsü atema ano anogo atsülanga liasü (May 19-21) ajisüaka sorkar ketdangsertemi maneni temelaba magütsü.

Iba mungdang nung

tangartem Khristan yimsü dangi meyipdaksütsü akok, ta shia Khristantem nem temelaba magütsü.

Sorkar ketdangsertemi anaben tashi temelaba magütsüba sülen pastor Solanki-i India temzüŋ nung Arrla 226 nung ajemdaker High Court nem temepishiba ken o agüja liasü.

June 16, 2025 nü iba ken o angadangba mapang nung Justice Subodh Abhyankar-i, tesüiba mapangtem nunga Khristan mungdangji tesüŋep nung agia aruogo, anungji ketdangsertemi tebilemtsü akatsüsa tamendakdak mali, ta metetdaksü.

Iba sülen court-i Solanki dang mungdang agitsü atema anogo melenshir temepishiba ken o tasen ka agüjang ta tuyua liasü.

"Iba ama temepishiba tasen ka agütsüra temelaba agütsütsü aser nenok nem security-a agütsütsü," ta High Court-i metetdaksü.

Pastor Solanki atema ken o jembitsür Dr Vivek Pandey-i, tawa Khristantem sentong agitsü atema temelaba magütsüba ya kanga bulua

ataloker, ta metetdaksü.

High Court-i temelaba agütsüba sülen Solanki-i, "Onok melung süngzüikogo aser pelar. Ketdangsertemi temelaba magütsübaji yimsü temeden nokdangtsü nükjidong nung inyakba lir," ta metetdaksü.

Khargone district nungisa pastor Kiran Badole-ia, Khristantemi tangartem tamangba yimsü meyipdaksür aser tensa raksadaksür ta shia 2023 küm nunga pai ayongzüikba mungdang ka nokdanga liasü, ta ashi.

Taküm April ita nunga Jhabua district nung ketdangsertemi Khristan mungdang ka agitsü temelaba magütsü, ajisüaka Khristantemi court nem temepishiba ken o agütsüba sülen High Court-i Khristantem nem temelaba agüja liasü.

Madhya Pradesh state densema tang India nung state 12 nung anti conversion ozüŋtem benokka lir. Khristantem sentong nokdangtsü aser pastor tem nem tai tongloksütsü atema right wing teloktemi anti conversion ozüŋ ya tim mesüi amshir.

ANO GO ABEN TSÜNGREM DEN

Tanelaji teremsep
1 Tesa. 5:19

Alima nung Tsüŋgrem mapa matalokdaksütsü asenoki nokdaksü makok saka asenoki Pa tanela asenok taküm nung remseptsü akok. Asen taküm nung Tanela Temeshi mapa inyaksü Tsüŋgremi asenok nem nüji agütsü. Kodang tanelai ashiba tashi mangalir, mesükshi-i yutsüdir, mesüra sentokdir asenoki asen taküm nung pa remsemdaksür. Isaia ainkari iba nungi adokba rasaa ashir: "Aser Pai ashi, oang aser iba nübur dang shiang, atangji nenoki angashir saka mangatetter, nenoki atangji angur saka memeteter" (Isaia 6:9; Mathi 13:14-15).

Kodang nai temenen menadir, Tanela Temeshi-i nü dang temulung meyiptsü ashir. Nai ashi mangai toktsüra aser temulung memeyipra Tsüŋgrem O nung ne mulung meranga akümtsü. Tsüŋgremi ne taküm asoshi mulunga aliba jembira aser nai aji songtemra, ne taküm nung Tanelai-i mejembitsü mapang ka arutsü. Tanelai jembiba nai maneni sentokra Tsüŋgrem nungi joko nai kecha O mangashitsü. Nai maneni Tsüŋgrem O nung tekong merangra, Pai ne nem O tasen kecha magütsütsü. Ne taküm nung Tanela Temeshi ola menokdangtsü kümdangang. Pa tanelai-i ashiba ajak nungbo na sünepba malitsü saka Pa O-i na talubusa taküm dangi anitsü.

USCIRF-i maneni Nigeria ya CPC list nung züŋgoktsü mepishir

June 20, 2025: June 13 nü Khristantem kümzüksü atema Nigeria kübok Yelwata nung inyaksüla aser ajak nem yimsü Catholic mission ka amakdang temeden agütsütsü atema Khristan 200 dak tali tepsetba inyaksüla, ta mepishi.

sülen United States USCIRF Chair?Vicky Commission on International Hartzler-ia, "US sorkari Religious Freedom (USCIRF)- Nigeria nem agütsüba senotsü i asentenshir US State teyariji tamangba yimsü Department dang Nigeria ya temeden jenjang kümzüksü Country of Particular Concern atema amshitsüla," ta (CPC) list nung züŋgoktsü metetdaksü.

mepishiogo, ta International Hombarnü Aid to the Christian Concern (ICC)-i Church in Need (ACN)-i report ka ajanga, Fulani Muslim nungertemi timtem agütsüba ajanga jenshia aliba Khristantem Islamic teloktemi amak aser kiojen aika rongdoktsüogo, ta metetdaksü.

ACN-isa, "Region nung tang tatalokba ya tamajungtiba lir, kechiyong khenyongi nisung jenti tepsetogo. Region nung Khristantem amakba kanga bulua kümogo aser Islamic kiralongrartemi Khristantem ajak meindoktsü nükjidong nung amaker," ta metetdaksü.

Taküm January ita nung Global Christian Relief report ka ajanga, 2022 küm nungi 2024 küm tashi nung Islamic kiralongrartemi Nigeria nung Khristan 10,000 jungnüa sorkar dang Nigeria nung tepsetogo, ta metetdakja liasü.

Iran yimden melentsü Israel nükjidong masü: Netanyahu



Jerusalem, Aami/June 20 (Agencies): Iran yimli laotsü ya Israel indang nükjidong masü, saka tang teraradak aliba ya ajanga ibaji ataloktsü akok, ta Israel Ato Kilonser Benjamin Netanyahu-i ashi.

Israeli public broadcaster Kan den jembidang, yimden melentsü ya Israel-i inyaktüsü merangba agenda ka masü saka Iran nunger tebilemtsü lir, ta Benjamin Netanyahu-i nenshia ashi.

"Yimden melentsü mesüra iba yimden laotsü ya mezüngbuba aser tongtipangtibaji Iran nübur asoshi lir. Iba atema temelen kecha mali," ta Netanyahu-i ashi.

"Iba yongji ni nükjidong ka ama mejembir. Iba ya result

asütsü akok, saka onoki sangdonga mesüra jembia aliba nükjidong ka masü," ta pai ashi.

Israel aser Iran tsüngta missile khaloktsütepa aser Israel-i Iran indang military infrastructure nung maka tensa tamajungba akumba mapang pai iba o ya jembia liasü.

Israeli Foreign Minister Gideon Saar-ia Iran nung yimten melentsüba ya tangbo Israel sorkar indang nükjidong ka masü ta shiogo, aser tang atemabo security cabinet ajanga iba ama policy renema mali ta ashi.

Ato Kilonser Netanyahu aser Foreign Minister Saar nati jembiba ya Defense Minister Israel Katz-i jembiba den khenyongi meputeper, shibai ghonda ishika tejakdang Iran

indang Supreme Leader Ayatollah Ali Khamenei ya takum alitsü memelatsü ta sangdonga Tel Aviv anasa mozüki ka nung missile khaloktsüba ya Ayatollah Ali Khamenei-i tuyuba ama inyakba lir ta tai tongloktüsü aser Iran lenir samatsütsü asoshi Israel-i ajak inyaktüsü ta ashi.

Mozüki amakba ta war crime lir ta pai ashi aser Netanyahu tenaprongi IDF dang Iran nung 'strategic targets' aser Tehran nung 'government targets' amaktsü totuyuba agütsüogo ta ashi.

US mitkari Tehran amaktsü akok ta osangtem angashiba ya tiazü lir aser ibai America nunger tashi masü Israel-i aginüba lir, ta Ayatollah Ali Khamenei-i ashi. Washington aser Tel Aviv dak indang indanga temeyong tulukja, United States tetsüng ajemokba ajanga Israel-i tamakok ajuruba sayur, ta Ayatollah Khamenei-i ashi.

"Zionist regime indang tembar America nungeri iba ama o jembiba ya par (Israel) tashi maitba temaitsü ka lir," ta Ayatollah Ali Khamenei-i ashi.

Thailand PM-i miima Cambodia lenir den phone nung jembiba temai adok

Bangkok, Aami/June 20 (Agencies): Thailand Ato Kilonser Paetongtarn Shinawatra aser Cambodia indang taoba lenir tsüngta phone nung minute 17 jembiba ajanga Thailand yimtenren nung mangatettep adoka coalition raksaogo aser ano mitkar temi tashiyim amshia sorkar atsüngdoktsü akok ta tetsübo nung lir.

Thailand, Cambodia aser Laos arütsü ajurutep aliba "Emerald Triangle" nung azüdokshiba sülen PM Paetongtarn-i arütsü tebilemtsü indang Cambodia Senate President Hun Sen den jembiba audio ya hopta tetenzüklen temai adoka liasü. May 28 nü raratepba nung Cambodia sepai ka astü, aser mangatettep ken o tejen asendenshia liasü.

Jembishinüba onük kisüng nung masü saka jembiba yimya ajanga mepelatep ya adok. Temai adokba recording nungya arishi küm 38 tain Thailand leniri Hun Sen dang "Uncle" ta aja aser arütsü nung oa aliba Thailand mitkar lenirtem dang "opponent" ta ajak.

Thailand nung alir aika atema, aser talisa nationalist right aser tashi tulu aliba mitkar tanishir temi ibai yimtenren tsütsü mera meshidak agiba kisüng masü saka akhi mapang nungi toktepa arur den tali atsüanem akaba temaitsü lir ta ashir.

Thailand ruling coalition nung party tulutiba jenjang tanabuba nung aliba Bhumjaithai Party-i Brehostibarnü coalition nungi ainshiogo aser ato kilonseri linük tejangraba nung atsü-anem akar aser mitkar tashi ajemtsür ta

aitsür. Bhumjaithai Party ainshiba ajanga züngem 500 aliba House of Representatives nung sorkar menden pongu kisüng agi timba sür sangzüa lir.

People's Party nungi opposition lenir Natthaphong Ruengpanyawut-i iba sensaksem temai adokba ya "final straw" lir ta ashi tangsa Parliament anener elections tasen agitsü akhanger.

Kasa anogo Government House nung longkak aiter temi Thai nunger nisan ayiptena placards amer Paetongtarn mapa nungi anentsü khanga liasü. Senator karibo impeachment motion benoktsü nangzükogo.

Paetongtarn-i yimjak nung tatok meshia tensa tajungba kumdaktsütsü nükjidong nung jembishinüba tasa ka lir ta shiaka teraksa ulura aser melenshitsü makok amai ajiteter. Osangbener den Brehostibarnü jembidang iba sensaksem temai adokba asoshi lai sasaba lematep aser Hun Sen den kodanga temai madoki jembishinü masütsü ta sangdong aser pai (Hun Sen) international diplomacy amshia par linük nung nüngtugu akumtsü meranger ta tai tongloktüsü.

Tena tsüngta phone ajanga jembiba recording ya Hun Sen kisüingi Cambodian ketdangsür 80 dak tema den lemsatep aser iba sülen pa indang Facebook page nung prokshi, koba Thailand indang Foreign Affairs Ministry nungi kanga sashia aitsü. Cambodian ambassador nem ken o agütsüba nung Cambodia-i diplomatic yimya nung kanga aibelenogo ta Thai

ketdangsür temi ashi.

Thailand ato kilonser ya Cambodia den kanga anükalemer ta mapang talangka nungi nationalist temi aija arur, aser lar kibong ya akhi mapang nungi Hun Sen den tesendaktep aliba yong iba temulung melemtetba tali akumer. La tebu aser taoba PM Thaksin Shinawatra-i Hun Sen ya "godbrother" ama züngshia aru aser mapang ka Cambodia sorkar indang advier ka ama inyaka lir. Thaksin aser pa tenu, taoba PM Yingluck Shinawatra, tenaprong mitkar temi tashiyim amshia 2006 aser 2014 nung atsüngdoka liasü.

Thailand yimten yimsüsüba nung mitkartem ya tashi tulu lir aser tang mepetmesü adoka aliba nunga parnok tetsüng ajemoktsü asü-masü ta aikati asüngdang. Brehostibarnü Royal Thai Army ajanga nüburtem dang sangdong ka nung linük temeden wazüka ayuba nung army dak tamang akatsü ayongzüka liasü.

Tang mangatettep adoka aliba phone call ya June 15 nü jembiba lir ta ashir aser iba mapang May ita raratepba sülen arütsü alema mesenzütsü tenokdangba agüja aliba agientsü sentongtem jembia liasü.

Cambodia nung nationalists temi May 28 mangatettep nung telangzüba agüja Thailand nungi bener aruba osettem nokdang, Thai dramas tem thitsü aser arütsü alema osangtsüsang agitepba anen. Thailand-i drone surveillance densema mitkar temi rara mesü ta tai tonglokja aliba parnoki magizüker.

KIBONG KÜMER KÜM 50 AJUNGER



N. Tako Imsong aser T. Chubala Jamir

Onoki teti meima, aser aküm tsübua aliba Obala aser Ojala kibong kümer küm 50 (fifty) ajungba anogo den külemi ano Obala arishi küm 80 (eighty) ajungba anogo tajung moatsünung Tsüngrem tenüng asanger. Ano maneni, onok akümdong süa alitsü asoshi anema aliba aser arishi talang moajangma ta onok telongjemi Sarasademer.

~ Chirnurtem, Semchirtem aser Kinungertem.

OFFICE OF THE
LONGPOK SEMCHIR TELONGJEM
DIMAPUR, CHUMOUKEDIMA & NIULAND NAGALAND
TETUSHI AGÜTSÜR

Dimapur Longpok Semchir telongjemi, Yaongyimsen yimtsüng nungi asür N. Tsukti Longkumer aser asür Thejano na jabaso Mr. Aliawati Longkumer, Democratic People's Republic of Korea dangi India Ambassador asütsü shimba atema tenüngsang agütsür.

Pa ya 1994 küm nungi Ministry of External Affairs nung inyaker, shibai wadang balala nung bendanglen linük aika nung tenzükogo.

Naga nunger aser talisa kidong nem konang tetushi bener arutsüba atema Longpok Semchir-i pa nem konang tetushi agütsür. Pa tarutsü nung anema lia takok nguyonga inyakyonga aotsü imlaja atar.

Sdl-
(K. MEYI LONGKUMER)
President



Sdl-
(MERENCHIBA LONGKUMER)
Gen. Secretary

SANGDONGER

Mr. Longkumpo S/o Late Takutoshi Longkhum, pai Longkum Riju indang tiyazü ken-o menaba yong angatetteptsü jaok, saka jena oadoker mangur/marur. Anungji kari ngura item agüja aliba numbertem ajanga tongtepratepdaktsüner.

Contact No. 9612826004 / 8575558979 / 9436439759

1. Imenba

2. Mayangmeren

3. Tongpangyimfo

Israel mitkari Gaza nung Palestine nunger 23 tepset

Gaza City, Aami/June 20 (Agencies): Israel sepaitemi

teyari oset lema agütsüba tesem ka anasa nisung adenshia alidak injang khaloktsüba nung Palestine nunger 23 tepsetogo, ta tenük kuli alirtem aser medics temi ashir.

Central Gaza nung US aser Israel nati yariba Gaza Humanitarian Foundation (GHF) ajanga lapoka aliba distribution centre anasa nisung meyririjang aika adenshia alidak tanks aser drones ajanga injang khaloktsü, ta tenük kuli alir aser medics temi ashi.

Nuseirat nung aliba al-Awda mozüki indang odongtar kati ashiba agi, parnoki nisung tasü mang 23 agizükogo aser nisung 100 dak tema yirua lir. Mozüki nung tangokba noksa tem nunga nisung tasü mang ali nung aliba nguogo.

Israel mitkar temi tang tashi telangzüba magütsüi lir. GHF-ibo parnok anasa injang khaloktsüba meliasü ta ashir. Hamas meyong health ministry-i ashiba agi, May ita tatemlen nungi iba mesük lendong nung Palestine nunger 400 dak tema tepsetogo.

Ibai Gaza nung UN ya teyari timba agüja aliba Israel-i alemyitsü meranga GHF ajanga aid distribution site timba agiba sülen atalokba lir.

Israel-i ita asem mokdanga chiyongtsü kata iba territory telungi me yokba sülen iba mera ya agi.

Yangji aliba prangbong bena alirtemi nüburtem dak injang khaloktsüba osanga lir, saka tatalokba ajunga amai Israel sepaitemi injang khaloktsüba nungi lir.

(Maneni tapak 8 nung...)

Indian hockey player nem Sports Ministry-i ita shia teyari agütsütsü

New Delhi, Aami/June 20 (Agencies):

Tang mezüngbuba, tetsür aser tebur national camps asoshi shimtetba India nunger hockey asayar nem monthly out-of-pocket allowance sen 25,000 agütsütsü, koba saisapong ketdangsüba tentet ajanga tanen makai mepishiba sülen sports ministry ajanga telemtetba agi.

Iba allowance nungi asayar 80 (tebur 40 aser tetsür 40) ajangzüksü, koba Target Olympic Podium Scheme indang developmental group nung aliba asayartem tashi lir. Iba telemtetba ya itashia amenba Mission Olympic Cell senden Brehostibarnü amendang agia liasü.

Iba allowance agütsüba ajanga sorkar ita shia sen 20 lakh indoktsü aser core group athletes tem ita shia sen 50,000 angutsü.

"Iba allowance ya Hockey India ajanga mapang tatsüka mepishia aru aser onoki iba takhangba agizüksü telemtetba agi. Asayar temi kanga junga shilem agia arur," ta Sports Minister Mansukh Mandaviya-i osangbener dang ashi.

Iba sen agütsüba nung yaritsü atema Hockey India

ajanga ita shia asayartem tenüing agütsütsüla.

"Tenüing agüja alirtem indang form aser fitness reprangtsü aser item nung ajemdaker tenüing tem melenshitsü akok, ta sports ministry ajanga ashi.

Tang hockey asayartem ya pei departments aser organisations nungi itasen agütsür, aser Hockey India ajanga graded contract system atema proposal agüja aliba küm ishika asadanga arur.

Parnok indang source of income tali ya Olympics aser Asian Games ama international sapang nung shiem junga agiba nungi arur.

Tebur team-i 2021 Tokyo Olympics aser iba sülen taoba küm Paris Games nung bronze medals ngua liasü. Tetsür team ya Tokyo nung pezü buba jenjang tongtet saka Paris asayamung nung qualify mesütet.

Team anaprong ya tang FIH Pro League's European leg nung asayatar, saka tang tashi temulung süa masayateti lir.

Kasa senden mapang MOC-ia sen crore 4.28 indang financial proposals agizükogo.

Iba funds nungi sen crore

1.38 ya Saketh Myneni, Jeevan Nedunchezhiyan aser tetsür asayar asem densema tennis asayar nem lemzüksütsü.

"Para-athletes nungi teyari balala atema proposals agütsüba agizükogo. Iba den külemi TOPS development group atema bendenlokba kar lir. Tang atema core group memelenshi lir," ta Sports Authority of India (SAI) ketdangsür kati ashi.

Ministry-i app ka amshia sempet alirtem jangjatetba maparen ulushitsü, kong SAI indang regional talent identification panels ajanga asadangtsü asoshi sempet aliba lanurtemi parnok indang performances upload asütsü.

"Reprangba nung sempet aliba ajitetra, lanurtem Khelo India Regional Centres nung jaoka parnok sempet asadangtsü. Ibaji ajanga sempet alir jangjaba maparen ulushitsü, koba tang age group competitions tashi dang lir," ta Mandaviya-i ashi.

"Iba ya ajanga meta tezülen aliba sempet aketer lanurtem jangjatetsü. Item ajunga ya National Sports Repository System nung shilem ka lir," ta pai ashi.

Bavuma Zimbabweden Test asayamung masayatetsü

Aami/June 20, 2025 (Agencies):

Taoba hopta otsüsütsüsa South Africa team World Test Championship takok dangi aniba sülen captain Temba Bavuma hamstring yiruba ajanga Zimbabwe den Test ana asayatsü aliba nung masayatetsüsa kümogo. Iba asayamung ya June 28 nü tenzüksü.

"Proteas tebur Test captain Temba Bavuma tetsüing tabelen nung hamstring yiruba sülen Zimbabwe den Test ana asayatsü aliba nung masayatetsüsa kümogo. Australia den Lord's Cricket Ground nung ICC World Test Championship Final asayaba mapang South Africa pur tanabuba innings nung tasemnübuba batting amenba mapang Bavuma yirua liasü. Pa yirur aliba maneni scan asütsü. Pa maliba mapang team ya Keshav Maharaj lenisüba nung asayatsü," ta South Africa cricket team indang X account nung post sütsü.

South Africa-i wicket pongu agi akokba asaya tanabuba innings nung Bavuma yiru aser

yirur liaka pai centurion Aiden Markram den senteper run 147 yanglua team takok dangi ani. Iba asaya nung pai run 66 yanglu. Team nung pa melena asayar shimba mesangdong aser Keshav Maharaj lenisüba nung SA team asayatsü.

WTC final nung Australia akokba ya South Africa team asoshi 1998 küm sülen mezüngbuba tongtibang asayamung ka akokba liasü. Iba masüidang parnoki tesüsa CC KnockOut Trophy (ICC Championship Trophy) koker liasü.

Proteas pur Bodhbarnü kidangi meyipa aoba mapang kanga mera keta agizükogo. Taoba hopta tatemi Lord's nung final asaya nung wicket pongu agi Australia akokba sülen Bavuma-i aniba team ya Johannesburg nung anenba sülen parnok pusemer meyrejang aikati agizüka liasü.

Zimbabwe den mezüngbuba Test asaya ya June 28 nungi July 2 tashi Queens Sports Club nung asayatsü aser tanabuba Test asaya ya Bulawayo nung July 6 nungi 10 tashi asayatsü.

BENDANGLI OSANG : Tapak 7 nungi...

Israel mitkari Gaza nung Palestine...

Brehostibarnüa teyari ataa alidang Israel sepaitemi Palestine nunger 12 tepset, ta rescuer aser medics temi ashir. GHF-i parnok anasa iba ama atalokba mali ta ashir. Israel mitkare temi Reuters dang ashiba agi, Netzarim nung "suspects" temi sepai alileni arutsü merang aser sepaitemi tekumdangtsü injang khaloktsü.

Mongulbarnüa Khan Younis anüdoklen lemjem ka anasa World Food Programme (WFP) site ka nung am angutsü teimla nung Palestine nunger meyerijang aika adenshia alidak Israel sepaitemi injang khalokja nisung 50 dak tema kaset, ta ashir. Israel mitkar temi IDF sepaitem anasa nisung telok ka jangjatet aser iba tatalokba asadangtar ta ashi.

Israel aser US teyari nung GHF ajanga chiyongtsü lema agütsüba ya meimchir asoshi tensa tamajungba ang kumdaktsür, ta UNICEF ajanga ashi.

Khatetba tesem nung densema item teyari agütsüba tesem lapokba indang tejangja memeteter, ta UNICEF odongtar James Elder-i ashi.

"Parnoki social media nung item tesem lapoka aliba ashir, saka Gaza nung internet

shibanga lir, anungji nüburtetemi memeteter," ta pai Geneva nungi osangbener dang ashi.

Ano central Gaza nung Deir al-Balah anüolen al-Ma'sar area nung Israel-i Hokulbarnü tayimtsü amshia ki ka amakba nung Palestine nunger 11 tepset aser dangar kar yiru, ta Palestinian Red Crescent ajanga ashir.

Israeli warplanes yagi Ayash kibong meyong storey ana atongtepa aliba ki amak, ta tenük kuli alirtemi ashi.

Israel aser Iran tsüngta rara tenzükba mapang mapang tatsüka tayimtsü amshia amakba anena liasü, saka ano asendenshir amaker, ta Hamas meyong civil defence ketdangsür temi ashir.

Gaza City anüolen Shati area nung kanga sashia amakdang Palestine nunger 77 tepset, ta parnoki Brehostibarnü shia liasü.

Hamas-i anir October 7, 2023 nü Israel south len arütsü alema aita nisung 1,200 shi tepseter nisung 251 pua bener aoba langzua Israel mitkari Gaza amak tenzük.

Iba sülen Gaza nung nisung 55,706 shi tepsetogo aser yangji tanur 15,000 dak tema lir, ta iba territory nung yimsü asüba Hamas indang health ministry ajanga ashir.

Bournemouth nungi Kerkez alizüksü Liverpool-i mulunga agizükogo



Milos Kerkez

Aami/June 20, 2025 (Agencies): Bournemouth nungi left-back Milos Kerkez pound million 40 agi alizüksü atema Liverpool-i mulunga agizükogo.

Arishi küm 21 tain Hungary nunger international asayar ya Cherries nungi season ana asayaba sülen Premier League champions den adentsü renema lir.

Bournemouth-i pa melena Rennes nungi Adrien Truffert alizükatokogo.

Club otsü tasen ka yanglua Bayer Leverkusen attacking midfielder Florian Wirtz pound million 116 agi alizüksü atema Liverpool pur tenangzüktepba tembanga yanglutsü ana nung

lia tang Kerkez den tenangzüktepba yangluogo.

Parnokisa, Dutch nunger right-back Jeremie Frimpong pound million 29.5 agi alizükogo.

Serbia nung asosang Kerkez ya senior jenjang nung

mezüngbuba Hungary club Gyor nungi asaya tenzük aser iba sülen Italy club AC Milan-i ao.

Pa iba Serie A club nungi asaya ka nung danga shilem magi aser 2022 küm January ita Dutch team AZ Alkmaar-i ao.

2022-23 season nung AZ Alkmaar pur Dutch top flight nung jenjang pezübuba tonga asayaba mapang pai teyari tulu agütsü aser pai asaya 52 nung goal pongu idaktsü aser assist tenet süja liasü.

Maneni AZ Alkmaar pur 2022-23 Europa Conference League semifinal tonga asaya saka parnoki West Ham makok.

Kerkez ya 2023 küm lemluwa Bournemouth nung aden aser iba mapang Liverpool sporting director Richard Hughes Bournemouth nung inyaka liasü.

Pa taoba season Bournemouth nungi league asaya 38 prongla nung asayaogo aser par team-i point 56 ngua Premier League nung tekububa nung tembanga liasü. Taoba season Kerkez-i goal ana idaktsü aser assist trok süja liasü.

Kerkez, shiba Hungary team nungi 23 ben asayaogo, pa Liverpool nung külem Hungary nunger asayar Dominik Szoboszlai den longjemtsü.

Pa Anfield-i arutsü inyaktepba ajanga Reds left-backs Andy Robertson aser Kostas Tsimikas na tarutsü mejangjai kümogo. Robertson bo Atletico Madrid den sendaktepa arudar.

Liverpool puri Robertson meyokner aser back-up Tsimikas ang odaktsüner, saka arishi küm 31 tain Robertson-i club toktsür oa asayatsü asoshiang shimtsü akok ta angateter.

BILEMDANGANG

"Azü medokshi takok anguba ya jangratemtsüka lir."